

ISTÈVENE FERRANTI PRESIDENTE NOU DE CONFAGRICOLTURA NÙGORO-OZASTRA

Istèvene Ferranti, 49 annos nàschidu in Nùgoro e residente in Tàtari, laureadu in Sièntzias zootènicas in sa Facultade de Meighina Veterinària de s'Universitàde de Tàtari est su presidente nou de Confagricoltura Nùgoro-Ozastra.

Impresàriu agrìculu, at un'azienda in Santa Luchia de Thiniscole inue, comente atividade primarza, pesat e domat caddos pro isport.

At fatu parte de su CdA de s'Istitutu de Incrementu Ippicu, at collaboradu comente tècnicu cun ASSI (EX UNIRE), at fatu parte de su Board Allevadores in sa FISE.

Como est zùighe de morfologia in su Dipartimentu de Chirca Incrementu Ippicu – Agris e faghet parte de sa Cumissione Compota Amessarzios de su DIRIP, in calidade de referente de s'Assessore rezionale pro sa Massaria; est Amministradore de s' ANACAAD de sa cale est sòtziu dae sa nàschida e est istadu primu presidente; est presidente de s'Assòtziu Interprovintziale Allevadores Nuoro-Ozastra; est amministradore de s'ARAS e faghet parte de su Comitadu de Presidèntzia, traballat cun sa Facultade de Meighina Veterinària de s' Universitàde de Tàtari.

Sas botatziones las ant fatas su 10 de frearzu de su 2012 e ant botadu sòtzios medas.

A prus de su presidente ant elèzidu duos vizepresidentes, Tonino Arcadu de Uliana e Servadore Mulargia de Thiniscole, su Cunsizu direttivu, su Comitadu de presidèntzia, su Collèziu de sos Revisores de sos Contos e su Collèziu de sos Probosviros.

Zai in sos meses colados sas delegatziones locales ant elèzidu sos delegados chi ant s'incàrrigu de amparare sas impresas a livellu territoriale, de sustènnere e promòvere sa massaria, de traballare paris cun sas amministrazziones locales.

Sardegna Agricola augurat bona sorte e de pòdere traballare cun profetu a dott. Ferranti, a dott. Arcadu, a dott. Mulargia e a totu su Cunsizu Direttivu

“So cuntentu pro custa eletzione – at naradu Istèvene Ferranti – in unu mamentu difitzile pro s'Organizatzione nostra e inue b'at cambiamentios econòmicos, sotziales e istitutzionales sighidos e cumplessos. Nos amus a impinnare pro fàghere un'atzione sindacale chi siet a tretu de parare fronte a sas medas chistiones abertas”.